

晉記卷二

本紀

蕭山郭倫撰

世祖本紀

世祖武皇帝諱炎字安世晉王昭之長子也性寬厚深沈有大度髮長委地兩手過膝魏嘉平中封北平亭侯累遷中撫軍進封新昌鄉侯晉國建立爲世子拜撫軍大將軍開府副貳相國咸熙二年立爲晉王太子八月辛卯晉王薨太子嗣國內行服三日下令寬刑宥罪撫衆息役九月以魏司徒何曾爲丞相鎮南將軍王沈爲御史大夫中護軍賈充爲衛將軍議

郎裴秀爲尙書令光祿大夫咸開府十一月初置四
護軍乙未令諸郡中正以六條舉淹滯一曰忠恪匪
躬二曰孝敬盡禮三曰友於兄弟四曰絜身勞謙五
曰信義可復六曰學以爲己

乙酉泰始元年冬十二月魏帝使太保鄭沖奉策禪
位於晉丙寅王稱皇帝設壇於南郊羣臣四夷咸會
告類於上帝還卽洛陽宮幸太極前殿大赦改元賜
天下爵人五級鰥寡孤獨不能自存者穀人五斛復
天下租賦及關市之稅一年逋債宿負皆勿收亡官
失爵者悉復除舊嫌解禁錮丁卯使太僕劉原告

於太廟。封魏帝爲陳畱王。邑萬戶。居於鄴宮。載天子
旌旗。備五時副車。行魏正朔。上書不稱臣。魏氏諸王
皆降爲縣侯。追尊宣王爲宣皇帝。景王爲景皇帝。文
王爲文皇帝。宣王后張氏爲宣穆皇后。母王氏爲皇
太后。稱崇化宮。封宗室爲諸王。以驃騎將軍石苞爲
大司馬。封樂陵公。車騎將軍陳騫爲高平公。衛將軍
賈充爲車騎將軍。封魯公。尙書令裴秀爲鉅鹿公。侍
中荀勗爲濟北公。太保鄭冲爲太傅。壽光公。太尉王
祥爲太保。睢陵公。丞相何曾爲太尉。朗陵公。御史大
夫王沈爲驃騎將軍。博陵公。司空荀顗爲臨淮公。鎮

北大將軍衛瓘爲菑陽公其餘增封進爵各有差文
武普增位二等改景初歷爲泰始歷臘以酉社以丑

戊辰下詔大宏儉約出御府珠玉玩好之物頒賜
王公以下各有差置中軍將軍以統宿衛七軍己
巳賜山陽公劉康安樂公劉禪子弟一人爲駙馬都
尉乙亥以安平王孚爲太宰詔曰昔王凌謀廢
齊王而王竟不足以守位鄧艾雖矜功失節然束手
受罪今大赦其家還使立後除魏氏宗室禁錮
諸將吏遭三年喪者遣寧終喪罷部曲將長吏以
下質任省郡國御調禁樂府靡麗百戲及雕文游

畋之具。初置諫官。

丙戌二年春正月，遣兼侍中侯史光等持節四方，循省風俗，除穰祝之不在祀典者。庚寅，罷雞鳴歌。

辛丑，尊伯母羊氏爲景皇后，稱宏訓宮。丙午，立皇

后楊氏。二月丁丑，除漢宗室禁錮。丁丑，郊。庚

午，詔曰：古者百官官箴王闕，然保氏特以諫諍爲職。

今之侍中常侍，實處此官，擇其能正色弼違，匡救不

逮者，以兼此選。以散騎常侍皇甫陶、傅元領諫官。

三月戊戌，吳使使來弔祭。秋七月辛巳，營太廟。

丙午晦，日有食之。八月丙辰，省右將軍官。冬十

月丙子朔日有食之。丁未詔曰：昔舜葬蒼梧，農不
易畝。禹葬成紀，市不改肆。上惟祖考清簡之旨，所徙
陵十里內居人，動爲煩擾。一切停之。十一月己卯，
倭人入貢。并園丘方丘之祀於南北郊。己丑，追
尊景帝元妃夏侯氏爲景懷皇后。辛卯，遷祖禰神
主於太廟。十二月，罷農官爲郡縣。

丁亥三年春正月癸丑，白龍二見於宏農澠池。丁
卯，立子衷爲皇太子。詔曰：朕以不德，託於四海之上。
兢兢祇畏，懼無以康濟寓內。思與天下式明王度。正
本清源，於置允樹嫡，非所先務。又近世每建太子，寬

宥施惠之事。閒不獲已。順從王公卿士之議耳。方今
世運垂平。將陳之以德義。示之以好惡。使百姓蠲多
幸之慮。篤終始之行。曲惠小仁。故無取焉。咸使知聞。
三月初。令二千石得終三年喪。丁未晝昏。太
山石崩。夏四月。徵犍爲李密爲太子洗馬。不至。
秋九月甲申。詔曰。古者以德詔爵。以庸制祿。雖下士
猶食上農。外足以奉公。忘私。內足以養親。施惠。今在
位者祿不代耕。非所以崇化之本也。其議增吏俸。賜
王公以下帛。各有差。以何曾爲太保。義陽王望爲
太尉。荀顗爲司徒。冬十月。聽士卒遭父母喪者。非

在疆場皆得奔赴。十二月，徙宗聖侯孔震爲奉聖

亭侯。山陽公劉康來朝。禁星氣讖緯之學。

戊子四年春正月辛未，以裴秀爲司空。丙戌，律令

成，封爵賜帛各有差。有星孛於軫。丁亥，帝耕藉

田。戊子，詔曰：古設象刑而衆不犯，今雖參夷而姦

不絕。何德刑相去之遠哉！先帝深愍黎元，哀矜庶獄，

乃命羣侯考正典刑。朕守遺業，永惟保乂，皇基思與

萬國以無爲爲政。方今陽春養物，東作始興，朕親率

王公卿士，耕藉田千畝。又律令旣成，班之天下，將以

簡法務本，惠育海內。宜寬有罪，使得自新。其大赦天

下長吏郡丞長史各賜馬一匹。二月甲寅以東海
劉儉有至行拜爲郎。以中軍將軍羊祜爲尙書左
僕射。三月戊子皇太后崩。夏四月戊戌太保睢
陵公王祥卒。己亥葬文明皇后。秋七月太山石
崩衆星西流如雨。戊午遣使者侯史光循行天下
己卯謁崇陽陵。九月青徐兗豫四州大水伊洛
溢合於河開倉以振之。冬十月吳侵江夏襄陽荆
州刺史胡烈擊敗之。吳將顧容侵鬱林太守毛炅
破之斬其交州刺史劉俊及將軍修則。十一月吳
將丁奉出芍陂屯守諸將擊走之。己未詔王公卿

尹及郡國守相舉賢良方正直言之士。十二月，班
五條詔書於郡國：一曰正身，二曰勤百姓，三曰撫孤
寡，四曰敦本息末，五曰去人事。庚寅，帝臨聽訟觀
錄，廷尉洛陽獄囚，扶南林邑各遣使入貢。
己丑，五年春正月丙申，帝臨聽訟觀錄囚徒。青龍
二見於滎陽，置秦州。二月辛巳，白龍二見於趙
國。青徐兗三州水，遣使振卹之。壬寅，以羊祜都
督荊州軍事。丁未，詔曰：古者歲書羣吏之能否，三
年而誅賞之。諸令史前後但簡遣疎劣而無有勸進
非黜陟之謂也。其條勤能有稱尤異者，歲爲常。吾將

議其功勞。己未，詔錄用故漢名臣子孫。夏四月，

地震。五月辛卯朔，鳳皇見於趙國，曲赦交趾九真

日南五歲刑。廣平大風。任城魯國池水如血。

六月，鄴奚官督郭廩上書諫，爭擢爲屯畱令。西平麴

路伐登聞鼓，言多祆謗，赦弗問。秋七月甲寅，白虹

貫日。延羣公詢讜言。九月，有星孛於紫宮。冬十

月丙子，賜汲郡太守王宏穀千斛。十二月，詔州郡

舉勇猛秀異之士。

庚寅六年春正月丁亥，帝臨軒，不設樂。吳將丁奉

入渦口，揚州刺史牽宏擊走之。三月，赦五歲刑以

下。夏四月，白龍二見於東莞。六月，大雨霖，河洛伊沁水溢，流民居五千家。戊午，秦州刺史胡烈擊叛寇於萬斛堆，力戰死之。以石鑒都督秦州。秋七月，丁酉，復隴右五郡遇寇害者租賦，其不能自存者廩貸之。乙巳，詔曰：自泰始已來，大事皆撰錄，祕書寫副，後有其事，宜綴集爲常。九月，大宛獻汗血馬焉耆入貢。冬十一月，幸辟雍，行鄉飲酒禮，賜太常博士帛牛酒各有差。立子東爲汝南王。十二月，大雪。吳夏口都督孫秀來降。辛卯，七年春正月丙午，皇太子冠，賜王公以下帛各

有差。匈奴帥劉猛叛出塞。吳侵壽陽。夏四月

吳將虞汜攻九真太守董元軍敗死之。北地匈奴

寇金城圍涼州刺史牽宏於青山宏敗死之。五月

立子憲爲城陽王。雍涼秦三州饑赦其境內殊死

以下。閏月大雩太官減膳詔交趾三郡及南中諸

郡無出今年戶調。六月丙申地震。詔公卿以下

舉將帥各一人。辛丑大雨霖伊洛河溢流居人四

千餘家殺三百餘人詔振貸給棺。秋七月癸酉以

賈充都督秦涼軍事不果行。交趾鬱林日南三郡

降吳。八月分益州南中四郡置寧州。曲赦四郡殊

死以下。冬十月丁丑日有食之。十二月大雪。

壬辰八年春正月匈奴左部帥李恪殺劉猛而降。

癸亥帝耕藉田。二月皇太子納妃賈氏。乙亥禁

雕文綺組非法之物。壬辰太宰安平王孚卒。詔

內外羣官舉任邊郡者各三人。帝與右將軍皇甫

陶論事。陶與帝爭言。散騎常侍鄭徽表請罪之。帝曰。

讜言謬。所望於左右也。人主常以阿媚爲患。豈以

諍臣爲損哉。徽越職妄奏。豈朕之意。遂免徽官。夏

五月旱。蜀地雨白毛。六月益州牙門張宏殺其

刺史皇甫晏。以王濬爲益州刺史。誅宏夷其三族。

壬辰大赦

丙申詔復隴右四郡遇寇害者田租

秋七月以賈充爲司空九月吳西陵督步闡來降

冬十月辛未朔日有食之十二月吳將陸抗拔

西陵誅闡將軍羊祜等救之弗克

癸巳九年春正月癸巳司徒石苞卒三月立子祗

爲東海王夏四月戊辰朔日有食之辛酉隕霜

自正月不雨至於六月秋七月丁酉朔日有食

之吳師圍弋陽將軍王渾擊敗之鮮卑寇廣甯

略五千餘人選公卿女備六宮冬十月辛巳制

女年十七父母不嫁者使長吏配之十一月臨宣

武觀大閱。自丁酉至甲辰乃罷。

甲午十年春正月乙未日有食之。辛亥帝耕藉田。

閏月丁亥詔曰。嫡庶之別。所以辨上下。明貴賤。而

近世以來。多皆內寵登妃后之職。亂尊卑之序。自今

以後。皆不得登用。妾媵以爲嫡正。二月分幽州五

郡置平州。三月癸亥日有食之。夏四月旱。六

月癸巳帝臨聽訟。觀錄囚徒。大蝗。秋七月丙寅。

皇后楊氏崩。壬午吳將孟泰王嗣來降。以山濤

爲吏部尙書。八月涼州虜寇金城諸郡。戊申葬

元皇后。九月太尉陳騫拔吳枳里。吳師寇江夏。

冬十月以嵇紹爲祕書丞。十一月庚午帝臨宣武觀大閱。十二月有星孛於軫。置藉田令。鑿陝南山決河東注洛以通漕。

乙未咸寧元年春正月戊午朔大赦改元。二月詔家有五女者給復。辛酉賜廉吏故鄴令夏謨穀百斛。賜公卿以下帛有差。夏五月下邳廣陵大風拔木。六月高平大風。鮮卑力微遣子來獻。吳寇江夏。戊申置太子詹事官。秋七月甲申晦日有食之。螟。八月丁酉大風折大社木有青氣自木出。九月青蟲食稼。徐州大水。冬十一月癸亥。